



**NY HASIN'NY TANY SY NY FANJAKANA
AMIN'IZAO VANIMPOTOANA IZAO
(OTA SY FADY)**

Ny heviny sy ny teny iainana azy

Ny "Hetsika Fanasina" dia hetsika amohazana sy ivoizana kolom-piainana sy jerim-panahy izay kendrena ho tafaorim-paka, hanjary fitandro sy fanahy raikitra iainan'ny taniamamonina.

Ny fitandrovam-pahendrena fonosin'ny FADY no anorenana azy. Misy **fombam-pahendrena** kiady miahny sy miambina ny taniamamonina sy ny fanjakana (politika) sady fiaro amin'ny antambo mitatao amin'ireo fonosin'ny FADY. Manankina amin'ny tsirairay avy ny fahendrena tandrovina. Mamatotra ny tsirairay ho samy tompon'antoka amin'ny vokatra ny ataony izay mianjera aminy izy tenany manokana sy izay maningotra ny tany sy ny fanjakana noho ny ataony ihany koa. Maka fototra sady midona hatrany ambadika mihoatra ny takatra sy voasahan'ny tsirairay izany fombam-pahendrena izany.

Anjaran'ny mpanao fikarohana, ny mpandalim-pinoana, ny mpanakanto, ny mpanao politika ... ny mitrandraka ny aina miafina mahatonga amin'izany.

Ny kendren'ny "Hetsika Fanasina" dia izay tsy hahatafandrimandry ny masom-panahin'ny taniamamonina ka tsy hamela azy ho "masobe tsy mahita" ny fambara apoitran'ny androany.

Ny babentsika androany

Indreo mifanontona ambony lohan'ny vahoaka amin'ity vanin-tantara ity ny lafiny samihafa mahafady ny fady. Santa-dratsin'ny **famingavingana sy famavetavetana** fototry ota ny fandrombaham-pahefana. **OTA** tsy roa amin'ny tadidimbahoaka teto ambany lanitra izao miseho izao. Manosy **hasina** ny fanjakana iaraha-manana (republika), **manota FADY** ny fombam-pitondrana an-tenierana (demokrasia) izay nanao izany. Fanta-poko fanta-pirenena ny Rangory fototry ny antambo na dia mijoro aman-kenatra mandrakodrakotra ny nataony aza.

Mitohivakana manao randran-tarihana manenika ny tany sy ny firenena manontolo ny **antambo niditra** noho ny nataony.

Fa na singan'olona izy na tarika samy tsy mahasakana, tsy mahafehy na mahafetra ny antambo vokatra ny nataony.

*- Aina latsaka tamin'ny fitaovam-piadiana, harena sy fananana rava kila hotohoto, haravambe amin'ny fihariam-pirenena sy ny fiarahamonina mahavery fanantenana ny amin'ny hoampitso.

*- Ny volofotsy tsy ananan-kasina. Ny fanahy ratsy no miroborobo: fifampiangana, lolompo sy fankahalana, kolikoly, fitetehana sy fambaboana fananan'ny hafa, asan-jiolahy, fanjakana savorovoro, savorovoro sy fisamahana hatrany anaty fihavanan'ny mpianakavy sy mpiaramonina ary hatramin'ny fiainam-panahy amam-pinoana very toky sy very fanilo.

*- Haravana hatramin'ny tontolo iainana mampamoifo ny taranaka velona izao sy ny taranaka aman-dimby. Ho ritra hatramin'ny haza any anaty ranomasina.

Ny fiarenana

Vahoaka voadona isika izao ka tsy maintsy mirary ho afaka amin'izany **ozona** izany ary ho tafarina. Mila fidiavana hamafana ny OTA FADY teto anivontsika. Soa lavo hahay mamindra. 'Ndao hanangana sy hamelona ny fomba **hanorenana indray** ny fiaro antoka ho an'ny ankehitriny sy ny taranaka aman-dimby ka:

- ny mikiry ho **tsivalahara** hivarinan'ny OTA sy hifandova ny henatry ny nataony,
- ny **"madio"** hibaboka fa varian-dratsy tsy nahambina izay hasina niantoka ny fiadanan'ny maro,
- ny **taranaka doria doria** hamelona ny fomba aman-kasina sy ny fady momba an'izany ho **fototra nohavaozina** hamaharan'ny jery amam-panahiny (hanatomombana ny fomba sy fitondrana an-tenimiera na demokrasia izay, miaraka amin'ny ny soa fitandro ny fanao sy fomban'ny fanjakana iaraha-manana na repoblika).

Eto am-pelatànantsika ny ahazoana mahatanteraka an'izany.

Ny "Hetsika Fanasina" dia asa mitozo ho famohazana ny jery amam-panahin'ny taniamamonina sy ho fivoizana ilay fombam-pahendrena miambina ny fanao aman-kasina politika ary mitandro ny fahaizamiainan'olompirenena tsy hanindroa amin'ny tanintsika ny "Ota sy Fady" nampiditra antambo iainana androany.

Ny tanjony dia ny hanononana ho fadin-taranaka doria doria rehefa mety ho fandrombaham-pahefana na fiakarana amin-kerisetra sy amboetra amin'ny fitondrana. Ary ho "Ota sy Fady" miaraka amin'izany koa ny fandikana ny fomba ankamasinina amin'ny fitondrana an-tenimiera (demokrasia) sy ny fomba ankamasinana amin'ny fiaraha-manana ny fanjakana (republika).